





水經第二十九

漢 桑 欽 撰

後魏 酈道元 注

明 吳 琯 校

沔水下

潛水

湍水

均水

粉水

白水

泚水

又東過堵陽縣堵水出焉自上粉縣北流注之

堵水自建平郡界故亭谷東歷新城郡郡故漢中

之房陵縣也世祖建武元年封鄧晨為侯國也漢

末以為房陵郡魏文帝合房陵上庸西城立以為



新城郡以孟達爲太守治房陵故縣有粉水縣居其上故曰上粉縣也堵水之傍有別谿岸側土色鮮黃乃云可噉有言飲此水者令人無病而壽豈其信乎又有白馬山山石似馬望之逼真側水謂之白馬塞孟達爲守登之而歎曰劉封申耽據金城千里而更失之呼爲上堵今音韻哀切有惻人心今水次尚歌之堵水又東北逕上庸郡故庸國也春秋文公十六年楚人秦人巴人滅庸庸小國附楚楚有災不救舉羣蠻以叛故滅之以爲縣屬漢中郡漢末又分爲上庸郡城三面際水堵水又

東逕方城亭而東北歷叅山下而北逕堵陽縣南北流注于漢謂之堵口漢水又東謂之澇灘冬則水淺而下多大石又東爲淨灘夏水急盛川多湍洑行旅苦之故諺曰冬澇夏淨斷官使命言二灘阻礙

又東過鄖鄉縣南

漢水又東逕鄖鄉縣南之西山上有石蝦蟆倉卒看之與真不別

漢水又東逕鄖鄉縣故城南

謂之鄖鄉灘縣故黎也卽長利之鄖鄉矣地理志



曰鄖有關李奇以爲鄖子國晉太康五年立以爲縣

漢水又東逕琵琶谷口

梁益二州分境於此故謂之琵琶界也

又東北流又屈東南過武當縣東北

縣西北四十里漢水中有洲名滄浪洲庾仲雍漢記謂之千齡洲非也是世俗語訛音與字變矣地說曰水出荆山東西流爲滄浪之水是近楚都故漁父歌曰滄浪之水清兮可以濯我纓滄浪之水濁兮可以濯我足余按尚書禹貢言導漾水東流

爲漢又東爲滄浪之水不言過而言爲者明非他水決入也蓋漢污水自下有滄浪通稱耳纏絡鄢郢地連紀郢咸楚都矣漁父歌之不違水地滄浪洲傳宜以尚書爲正耳

漢水又東爲佷子潭

潭中有石磧洲長六十丈廣十八丈世亦以此洲爲佷子葬父於斯故潭得厥目焉所未詳也

漢水又東南逕武當縣故城北

世祖封鄧晨子堂爲侯國內有一碑文字磨滅不可復識俗相傳言是華君銘亦不詳華君何代之



漢水又東平陽川水注之

水出縣北伏親山南歷平陽川逕平陽故城下又南流注于沔

沔水又東南逕縣城東

又東曾水注之水導源縣南武當山一曰太和山亦曰叅上山山形特秀又曰仙室荊州耑副記曰山形特秀異於衆嶽峰首狀博山香爐亭亭遠出藥食延年者萃焉晉咸和中歷陽謝允舍羅邑宰隱遯斯山故亦曰謝羅山曾水發源山麓逕越山

陰東北流注于沔謂之曾口

沔水又東逕龍巢山下

山在沔水中高十五丈廣員一里二百三十步山形峻峭其上秀林茂木隆冬不凋

又東南逕涉都縣東北

故鄉名也按郡國志筑陽縣有涉都鄉者也漢武帝元光元年封南海守降侯子嘉為侯國均水於縣入沔謂之均口也

又東南過鄼縣之西南

縣治故城南臨沔水謂之鄼頭漢高帝五年封蕭



何爲侯國也薛瓚曰今南鄉鄧頭是也茂陵書曰在南陽王莽更名南庾者也

又南逕穀城東又南過陰縣之西

沔水東逕穀城南而不逕其東矣城在穀城山上春秋穀伯綏之邑也墉闔頽毀基塹亦存沔水又東南逕陰縣故城西故下陰也春秋昭公十九年楚工尹赤遷陰于下陰是也縣東有縣令濟南劉熹字德怡魏時宰縣雅好博古學教立碑載生徒百有餘人不終業而夭者因葬其地號曰生墳沔水又東南得洛谿口

水出縣西北集池陂東南流逕洛陽城北抗洛谿谿水東南注沔水也

又南過筑陽東筑水出自房陵縣東過其縣南流注之

沔水又南汎水流注之水出梁州閬陽縣魏遣夏侯淵與張郃下巴西進軍宕渠劉備軍汎口卽是水所出也張飛自別道襲張郃於此水郃敗棄馬升山走還漢中汎水又東巴西歷巴渠北新城上庸東逕汎陽縣故城南晉分筑陽立自縣以上山溪水急枉渚崩湍水陸徑絕



又東逕學城南

梁州大路所由也舊說昔者有人立學都於此值世荒亂生徒罔依遂共立城以禦難故城得厥名矣泚水又東流注于沔謂之泚口也沔水又南逕闕林山東本郡陸道之所由山東有二碑其一卽記闕林山文曰君國者不躋高堙下先時或斷山岡以通平道民多病守長冠軍張仲踰乃與邦人築斷故山道於此銘其一郭先生碑先生名輔字甫成有孝友悅學之美其女爲立碑於此蓋無年號皆不知何代人也

沔水又南逕筑陽縣東

又南筑水注之杜預以爲彭水也水出梁州新城郡魏昌縣界縣以黃初中分房陵丘筑水東南流逕筑陽縣水中有孤石挺出其下澄潭時有見此石根如竹根而黃色見者多凶相與號爲受石所未詳也筑水又東逕筑陽縣故城南縣故楚附庸也秦平鄢郢立以爲縣王莽更名之曰宜禾也建武元年世祖封吳財爲侯國筑水又東流注于沔謂之筑口沔水又南逕高亭山東山有靈焉士民奉之所請有驗



沔水又東爲漆灘

新野郡山都縣與順陽筑陽分界於斯灘矣

又東過山都縣東北

沔南有固城城側沔川卽新野山都縣治也舊南陽之赤鄉矣秦以爲縣漢高后四年封衛將軍王恬爲侯國沔北有和城卽郡國志所謂武當縣之和聚山都縣舊嘗治此故亦謂是處爲故縣灘沔水北岸數里有大石激名曰五女激或言女父爲人所害居固城五女思復父怨故立激以攻城城北今淪於水亦云有人葬沔北墓宅將爲水毀其

人五女無男皆悉巨富共修此激似今墳宅然激作甚工又云女嫁爲陰縣恨子家貨萬金而自少小不從父語父臨亾意欲葬山上恐兒不從故命言葬我著渚下石磧上恨子曰我由來不奉教今從語遂盡散家財作石冢積土繞之成一洲長數百步元康中始爲水所壞今石皆如半榻許數百枚聚在水中恨子是前漢人襄陽太守胡烈有惠化補塞隄決民賴其利景元四年九月百姓刊石銘之樹碑於沔水又東偏淺冬月可涉渡謂之交湖兵戎之交多自此濟晉太康中得鳴石於此水



水經 卷之二十九  
撞之聲聞數里

沔水又東逕樂山北

昔諸葛亮好爲梁甫吟每所登遊故俗以樂山爲名

沔水又東逕隆中

歷孔明舊宅北亮語劉禪云先帝三顧臣於草廬之中咨臣以當世之事卽此宅也車騎沛國劉季和之鎮襄陽也與犍爲人李安共觀此宅命安作宅銘云天子命我于沔之陽聽鼓鞀而永思庶先哲之遺光後六十餘年永平之五年習鑿齒又爲

其宅銘焉

潛水出巴郡宕渠縣

潛水蓋漢水枝分潛出故受其稱耳今受有大穴潛水入焉通岡山下西南潛出謂之伏水或以爲古之潛水鄭玄曰漢別爲潛其穴本小水積成澤流與漢合大禹自廣漢疏通卽爲西漢水也故書曰沱潛旣道劉澄之稱白水入潛然白水與羌水合入漢是猶漢水也縣以延熙中分巴立宕渠郡蓋古賓國也今有賓城縣有渝水夾水上下皆賓民所居漢祖入關從定三秦其人勇健好歌舞高



祖愛習之今巴渝儻是也縣西北有不曹水南逕其縣下注潛水縣有車騎將軍馮緄桂陽太守李温冢二子之靈常以三月還鄉水暴長郡縣吏民莫不於水上祭今所謂馮李也  
又南入于江

庾仲雍云墊江有別江出晉壽縣卽潛水也其南源取巴西是西漢水也

湍水出酈縣北芬山南流過其縣東又南過冠軍縣東

湍水出弘農界翼望山水甚清徹東南流逕南酈

縣故城東史記所謂下酈也漢武帝元朔元年封左將黃同爲侯國湍水又南菊水注之水出西北石澗山芳菊谿亦言出祈谷蓋谿澗之異名也源傍悉生菊草潭澗滋液極成甘美云此谷之水土飡挹長年司空王暢太傅袁隗太尉胡廣並汲飲此水以自綏養是以君子留心甘其臭尚矣菊水東南流入于湍湍水又逕其縣東南歷冠軍縣西北有楚塢高下相承八重周十里方塘蓄水澤潤不窮湍水又逕冠軍縣故城東縣本穰縣之盧陽鄉宛之臨駝聚漢武帝以霍去病功冠諸軍故立



冠軍縣以封之水西有漢太尉長史邑人張敏碑  
碑之西有魏征南軍司張詹墓墓有碑碑背刊云  
白楸之棺易朽之裳銅鐵不入凡器不藏嗟矣後  
人幸勿我傷自後古墳舊冢莫不夷毀而是墓至  
元嘉初尚不見發六年大水蠻饑始被發掘說者  
言初開金銀銅錫之器朱漆雕刻之飾爛然有二  
朱漆棺棺前垂竹簾隱以金釘墓不甚高而內極  
寬大虛設白楸之言空負黃金之實雖意固南山  
寧同壽乎湍水又逕穰縣爲六門陂漢孝成之世  
南陽太守邵信臣以建昭五年斷湍水立穰西石

碣至元始五年更開三門爲六石門故號六門場  
也溉穰新野昆陽三縣五千餘頃漢末毀廢遂不  
修理晉太康三年鎮南將軍杜預復更開廣利加  
于民今廢不修矣六門側猶有六門碑是部曲主  
安陽亭侯鄧達等以太康五年立湍水又逕穰縣  
故城北又東南逕魏武故城之西南是建安三年  
曹公攻張繡之所築也

又東過白牛邑南

湍水自白牛邑南建武中世祖封劉嵩爲侯國湍  
水又東南逕安衆縣故城南縣本之西鄉漢長



沙定王子康侯丹之邑也湍水東南流涅水注之  
水出涅陽縣西北岐棘山東南逕涅陽縣故城西  
漢武帝元朔四年封路最爲侯國王莽之所謂前  
亭也應劭曰在涅水之陽矣縣南有二碑碑字紊  
滅不可復識云是左伯桃碑涅水又東南逕安衆  
縣塌而爲陂謂之安衆港魏太祖破張繡於是處  
與荀彧書曰繡遏吾歸師迫我死地蓋於二水之  
間以爲汭涉之艱阻也涅水又東南流注于湍水  
又東南至新野縣東入于濟

湍水至縣西北東分爲鄧氏陂漢太傅鄧禹故宅  
存焉  
其奉朝請西亭侯鄧晨故宅隔陂鄧颺爲晨宅略

均水出浙縣北山南流過其縣之東

均水發源弘農郡之盧氏縣熊耳山山南卽脩陽  
葛陽二縣界也雙峰齊秀望若熊耳因以爲名齊  
桓公邵陵之會西望熊耳卽此山也太史公司馬  
遷皆嘗登之縣卽浙縣之北鄉故言出浙縣北也  
均水又東南流注逕其縣下南越南鄉縣又南流  
與丹水合

又南當涉都邑縣北南入于沔



均水南逕順陽縣西漢哀帝更爲博山縣明帝復曰順陽應劭曰縣在順水之陽今於是縣則無聞於順水矣章帝建初四年封衛尉馬康爲侯國晉太康中立爲順陽縣西有石山南臨洧水洧水又南流注于沔水謂之洧口者也故地理志謂之洧水言熊耳之山洧水出焉又東南至順陽入于沔粉水出房陵縣東流過郢邑南

粉水導源東流注上粉縣取此水以漬粉則皓耀鮮潔有異衆流故縣水皆取名焉又東過穀邑南東入于沔

粉水至筑陽縣西而下注于沔水謂之粉水粉水有文將軍冢墓隧前有石虎石柱甚修麗閭丘羨之爲南陽葬婦墓側將平其域夕忽夢文諫止羨之不從後羨之爲楊佺期所害論者以爲文將軍之祟也

白水出朝陽縣西東流過其縣南

王莽更之曰朝陽也爲屬信縣應劭曰縣在朝水之陽今朝水逕其北而不出其南也蓋邑郭淪移川渠狀改故名舊傳遺稱在今也

又東至新野縣西東入于洧



水經 卷之二十九  
泚水出泚陽東北太胡山東南流逕其縣南泄水從南來注之

太胡山在泚陽北如東三十餘里廣員五六十里張衡賦南都所謂天封太胡者也應劭曰泚水出泚陽縣東入蔡經云泄水從南來注之然泚陽無泄水蓋悞引之壽春泚泚耳余以延昌四年蒙除東荊州刺史州治泚陽縣故城城南有蔡水出南磐石山故亦曰磐石川西北流注于泚非泄水也呂氏春秋曰齊令章子與韓魏攻荆荆使唐蔑應之夾泚而軍欲視水之淺深荆人射之而莫知也

有菡者曰兵盛則水淺矣章子夜襲之斬蔑於是水之上也泚水又西澳水注之水北出茈丘山東流屈而南轉又南入于泚水按山海經云澳水又北入視不注泚水余按呂忱字林及難字爾雅並言灤水在泚陽脉其川流所謂診其水土津注宜是灤水音藥也泚水又西南歷長岡月城北舊泚水又會馬仁陂水水出濩陰北山泉流競湊水積成湖蓋地百頃謂之馬仁陂陂水歷其縣下西南竭之以溉田疇公私引列水流遂斷故瀆尚存泚水又南逕會口與緒水枝津合泚水又南與澧水



會澧水源出于桐栢山與淮同源而別流西注故亦謂水爲派水澧水西北流逕平氏縣故城東北王莽更名其縣曰平善城內有南陽都鄉正衛彈勸碑澧水又西北合洩水水出湖陽北山西流北屈逕平氏城西爲北入澧水澧水又西注泚水泚水自下亦通謂之爲派水昔漢光武破甄阜梁丘賜於泚水西斬之於斯水也泚水又南趙澧二渠出焉泚水又西南流謝水注之水出謝城北二源微小至城漸大城周廻側水詩所謂申伯番番旣入于謝者也世祖建武十三年封樊重少子丹爲

謝陽侯卽其國也然則是水卽謝水也岸下深浚流徐平時人目之爲澹澹水城成又以澹澹爲目非也其西城之舊棘陽縣治故亦謂之棘陽城也謝水又東南逕新都縣左注泚水又西南流逕新都縣故城西王莽更之曰新林郡國志曰以爲新野之東鄉故新都者也又西至新野縣南入于涓

泚水於岡南西南流戍在岡上泚水又西南與南長坂門二水合其水東北出湖陽東隆出山之西側有漢日南太守胡著碑子玠騎都尉尚湖陽長



公主卽光武之伯姊也廟堂皆以青石爲階陛廟  
北有石堂珎之玄孫桂陽太守瑒以延熹四年遭  
母憂於墓次立石祠勒銘于梁石宇傾頽而梁宇  
無毀盛弘之以爲樊重之母畏雷室蓋傳疑之謬  
也陸山南有一小山山坡有兩石虎相對夾隧道  
雖處蠻荒全無破毀作制甚工信爲妙矣世人因  
謂之爲石虎山其水西南流逕湖陽縣故城南地  
理志曰故蓼國也竹書紀年曰楚王會宋平于湖  
陽者矣東城中有二碑似是樊重碑悉載故吏人  
名司馬彪曰仲山甫封於樊因氏國焉爰自宅陽

徙居湖陽能治田殖至三百頃起廬舍高樓連閣  
波陂灌注竹木成林六畜放牧魚羸梨菓檀棘桑  
麻閉門成市兵弩器械貲至百萬其興工造作爲  
無窮之巧不可言富擬封君世祖之少數歸外氏  
及之長安受業齎送甚至世祖卽位追爵敬侯詔  
湖陽爲重立廟置吏奉祠巡祠章陵常幸重墓其  
水四周城漑城之東南有若令樊萌中常侍樊安  
碑城南有數碑無字又有石廟數間依于墓側棟  
宇崩毀惟石壁而已亦不知誰之冑族矣其水南  
入大湖湖陽之名縣藉茲而納稱也湖水西南流



又與湖陽諸陂散水合謂之板橋水又西南與醴  
渠合又有趙渠注之二水上承派水南逕新都縣  
故城東兩瀆雙引南合板橋水板橋水又西南與  
南長水會水上承唐子襄鄉諸陂散流也唐子陂  
在唐子山西南有唐子亭漢光武自新野屠唐子  
鄉殺湖陽尉於是地陂水清深光武後以爲神淵  
西南流於新野縣與板橋水合西南注于泚水又  
西南流注于流水也

水經第二十九

水經第三十

漢 桑 欽 撰  
後魏 酈 道 元 注  
明 吳 瑄 校

淮水

淮水出南陽平氏縣胎簪山東北過桐栢山

山海經曰淮出餘山在朝陽東義鄉西尚書導淮  
自桐栢地理志曰南陽平氏縣王莽之平善也風  
俗通曰南陽平氏縣桐栢大復山在東南淮水所  
出也淮均也春秋說題辭曰淮者均其勢也釋名



曰淮韋也韋繞揚州北界東至于海也爾雅曰淮爲許然淮水與醴水同源俱導西流爲醴東流爲淮自潛流也下三十許里東出桐栢之大復山南謂之陽口水南卽復陽縣也闕駟言復陽縣胡陽之樂鄉也元帝元延二年置在桐栢大復山之陽故曰復陽也東觀漢記曰朱祐少婦歸外家復陽劉氏山南有淮源廟廟前有碑是南陽郭苞立又二碑並是漢延熹中守令所造文辭鄙拙殆不可觀故經云東北過桐栢也

淮水又東逕義陽縣

縣南對固成山山有水注流數丈洪濤灌山遂成巨井謂之石泉水北流注于淮

淮水又逕義陽縣故城南

義陽郡治也世謂白茅城其城圓而不方闕駟言江國也嬴姓矣今其地有江亭春秋文公四年楚人滅江秦伯降服出次日同盟滅雖不能救敢不矜乎地理志曰漢乃縣之呂后八年封淮南厲王子劉勃爲侯國王莽之均夏也

淮水又東得澗口水

源南出大潰山東北流翼帶三川亂流北注澗水



又北逕賢首山西又北出東南屈逕仁順城南故  
義陽郡治分南陽置也晉太始初以封安平獻王  
孚長子望本治在石城山上因梁希侵逼徙治此  
城齊司州刺史馬鮮卑不守魏置郢州也昔帝珍  
竒自懸鄒遣三千騎援義陽行事龐定光屯于澗  
水者也澗水東南流歷金山北山無樹木峻峭層  
峙澗水又東逕義陽故城北城在山上因倚陵嶺  
周迴三里是郡昔所舊治城城南一十五步對門  
有天井周一百餘步深一丈東逕鍾武故城南本  
江夏之屬縣也王莽之當利縣矣又東逕石城山

北山甚高峻史記曰魏攻冥阨音義曰冥阨或言  
在鄆縣箱山也按呂氏春秋九塞其一也澗水逕  
鄆縣故城南建武中世祖封鄧邯爲鄆縣按蘇林  
曰音育澗水又東逕七井岡南又東北注于淮淮  
水又東至谷口谷水南出鮮金山北流至瑟水注  
之水出西南具山東北逕光淹城東而北逕青山  
晉大始中割南陽東鄙之安昌平林平氏義陽四  
縣置義陽郡於安昌城又太康記晉書地道記並  
有義陽郡以南陽屬縣爲名漢武帝元光四年封  
北地都尉衛山爲侯國也有九渡水注之水出雞



翅山礮澗澹委汭遡九渡矣其猶零陽之九渡水故亦謂之爲九渡焉於溪之東山有一水發自山椒下數丈素湍直注頽波秀壑可數百丈望之若霏幅練矣下注九渡水九渡水又北流注于淮東過江夏平春縣北

淮水又東油水注之

水出縣西南油溪東北流逕平春縣故城南漢和帝建初四年封子全爲王國淮水又東曲岸北有一土穴徑尺泉流下注汭流波三丈入于油水亂流南屈又東北注于淮淮水又東北逕城陽縣故

城南漢高帝十二年封定侯奚意爲侯國王莽之利新也魏城陽郡治

淮水又東北與大木水合

水西出大木山山卽晉車騎將軍祖逖自陳留將家避難所居也其水東逕城陽縣北而東入于淮淮水又東北流左會湖水

傍川西南出窮溪得其源也

淮水又東逕安陽縣故城南

東羅山西東北流注于谷水谷水東北入于淮又東逕新息縣南



淮水東逕故息城南春秋左傳隱公十一年鄭息有違言息侯伐鄭鄭伯敗之者也

淮水又東逕浮光山北

亦曰扶光山卽弋山也逕新息縣故城南應劭曰息後徙東故加新也王莽之新德也光武十九年封馬援爲侯國外城北門內有新息長賈彪廟廟前有碑面南又有魏汝南太守程堯碑魏太和中蠻田益宗劾域立東豫州以益宗爲刺史淮水又東合慎縣水水出慎陽縣西而東逕慎陽縣故城南縣取名焉漢高帝十一年封欒說爲侯國潁陰劉

陶爲縣長政化大行道不拾遺以病去官童謡歌曰悒然不樂思我劉君何時復來安此下民見思如此應劭曰慎水所出東北入淮慎水又東流積爲焦陂陂水又東南流爲上慎陂又東爲中慎陂又東南爲下慎陂皆與鴻郗陂水散流其陂首受淮川左結鴻陂漢成帝時翟方進奏毀之建武中汝南太守鄧晨欲修復之知許偉君曉知水脉召與議之偉君言成帝用方進言毀之尋而夢上天天帝怒曰何故敗我濯子淵是後民失其利時有童謡曰敗我陂翟子威及子覆陂當復明府興復廢



業童謡之言將有徵矣遂署都水掾起塘四百餘里百姓得其利陂水散流下合慎水而東南逕息城北又東逕南入淮謂之慎口淮水又東與申陂水合水上承申陂於新息縣北東南流分爲二水一水逕深丘西又屈逕其南南派爲蓮湖水南流注于淮淮水又左迤流結兩湖謂之東西蓮湖矣淮水又東右壑水

水出白沙山東北逕柴亭西俗謂之柴水又東北流與潭溪水合水發潭谷東北流右會柴水柴水又東逕黃城西故弋陽縣也城內有二城西卽黃

城也柴水又東北入於淮謂之柴口也

淮水又東北申陂枝水注之

水首受陂水于深丘北東逕釣臺南臺在水曲之中臺北有琴臺又東逕陽亭南東南合淮

淮水又東逕淮陰亭北又東逕白城南

楚白公勝之邑也又東北去白亭一十里

淮水又東逕長陵戍南又東青陂水注之

分青陂東瀆東南逕白亭西又南於長陂戍東東南入于淮

淮水又東北合黃水



水出黃武山東北流木陵關水注之水導木陵山西  
北流注于黃水黃水又東逕晉西陽城南又東逕  
南光城南光郡治又東北逕高城南故弦高國也  
又東北逕弋陽郡東有虞丘郭南有子相廟黃水  
又東北入于淮謂之黃口淮水又東北逕襄信縣  
故城南而東注流之者也

又東過期思縣北

縣故蔣國周公之後也春秋文公十年楚王田于  
孟諸期思公復遂爲右司馬楚滅之以爲縣漢高  
帝十二年以封賁赫爲侯國城之西北隅有楚相

孫叔敖廟前有碑

淮水又東北淠水注之

一作淠

水出弋陽縣南垂山西北流歷陰山關逕二城間  
舊有賊難軍所謂頓防西北出山又東北流逕新  
城戍東又東北得詔虞水口西北去弋陽虞丘郭  
二十五里水出南山東北流逕詔虞亭東而北入  
淠水又東北注淮俗曰白鷺水

東過原鹿縣南汝水從西北來注之

縣卽春秋之鹿上也左傳僖公二十一年宋人爲  
鹿上之盟以求諸侯於楚建武十五年世祖更封



侍中執金吾陰鄉侯陰識爲侯國者也

又東過廬江安豐縣東北決水從北來注之

廬江故淮南也漢文帝十六年別以爲國應劭曰故廬子國也決水自舒蓼北注不於北來也安豐東北注淮者窮水矣又非決水皆誤耳

淮水又東谷水入焉

水上承富水東南流世謂之谷水也東逕原鹿縣故城北城側水南谷水又東逕富陂縣故城北俗謂之成閭亭非也地理志曰汝南郡有富陂縣建武二年世祖改封平鄉侯王霸爲富陂侯十三州

志曰漢和帝永元九年分汝陰置多陂塘以溉稻故曰富陂縣也谷水又東於汝陰城東南注

淮水又東北左會潤水

水首受富陂東南流爲高塘陂又東積而爲陂水東注焦陵陂陂水北出爲鮑陂陂水潭漲引瀆北注汝陰四周墮塹下注潁水焦湖東注謂之潤水逕汝陰縣東逕荆亭北而東入

淮水又東北窮水入焉

水出六安國安豐縣窮谷春秋左傳楚救瀆司馬沈尹戌與吳師遇于窮谷者也川流泄注于決水



之右北灌安豐之左世謂之豐豐水亦曰窮水音  
戎並聲相近字隨讀轉流結爲陂謂之窮陂塘堰  
雖淪猶用不輟陂水四分農事用康北流注于淮  
京相璠曰今安豐有窮水北入淮淮水又東爲安  
豐津水南有城故安豐都尉治後立霍丘戍淮淮  
中有洲俗號關洲蓋津關所在故斯洲納稱焉魏  
書國志有曰司馬景王征毋丘儉使鎮西將軍豫  
州刺史諸葛誕從安豐津先至壽春儉敗與小弟  
秀藏水草中安豐津都尉部民張屬斬之傳首京  
都卽斯津也

又東北至九江壽春縣西泚水洪水合北注之又東  
潁水從西北來流注之

淮水又東左合泚口又東逕中陽亭北爲中陽度  
水流淺磧可以厲也

淮水又東流與潁口會東南逕倉陵北又東北流逕  
壽春縣故城西

縣卽楚考烈王自陳徙此秦始皇立九江郡治此  
兼得廬江豫章之地故以九江名郡漢高帝四年  
爲淮南國孝武元狩六年復爲九江焉文穎曰史  
記貨殖傳曰淮以北沛陳汝南南郡爲西楚彭城



以東東海吳廣陵爲東楚衡山九江江南豫章長沙爲南楚是爲三楚者也

淮水又北左合椒水

水上承淮水東北流逕虵地南又歷其城東亦謂之清水東北流注于淮水謂之清水口者左合椒水焉

又東過壽春縣北肥水從縣東北流注之

淮水於壽陽縣西北肥水從城而北入于淮謂之肥口淮水又北夏肥水注之水上承沙水於城父縣右出東南流逕城父縣故城南王莽之思善也

縣故焦夷之地春秋左傳昭公九年楚公子棄疾遷許于夷實城父矣取州來淮北之田以益之伍舉授許夷田杜預曰此時改城父爲夷故傳實之者也言夷田在濮水西者也然則濮水卽沙水之兼稱得夏肥之通目矣漢桓帝永壽元年封大將軍梁冀孫桃爲侯國者也夏肥水自縣又東逕思善縣之故城南漢章帝章和三年分城父立夏肥水又東爲高坡又東爲天淙陂水出分爲二流南爲肥水北爲雞陂夏肥東流左合雞水水出雞陂東爲黃陂又東南流積爲茅陂又東爲雞水呂氏



春秋曰宋人有取道者其馬不進投之雞水是也  
雞水又會肥水而亂流東注俱入于淮

淮水又北逕山碇中謂之碇石

對岸山上結二城以防津要西岸山上有馬跡世  
傳淮南王乘馬昇仙所在也今山之東南石上有  
大小馬跡一十餘所仍今存焉淮水又北逕下蔡  
縣故城東本州來之城也吳季札始封延陵後邑  
州來故曰延州來矣春秋襄公二年蔡成公曰新  
蔡遷于州來謂之下蔡也淮之東岸又有一城下  
蔡新城也二城對據翼帶淮濱淮水東逕八山北

山上有老子廟淮水歷潘城南置潘溪戍戍東側  
潘溪吐川納淮更相引注又東逕梁城臨側淮川  
川左有湄城淮水左迤爲湄湖淮水又右納洛川  
於西曲陽縣北水分閻溪北絕橫塘北逕蕭亭東  
又北鵲甫溪水入焉水出東鵲甫谷西北流逕鵲  
甫亭南西北流注于洛水北逕西曲陽縣故城東  
王莽之延平亭也應劭曰縣在淮曲之陽下邳有  
曲陽故是加西也洛澗北歷秦墟下注淮謂之洛  
口經所謂淮水逕壽春縣北肥水縣東北注者也  
蓋經之謬矣考川定土卽實爲非是曰洛澗非肥



水也

淮水又北逕莫耶山西

山南有陰陵縣故城漢高祖五年項羽自垓下從數百騎夜馳渡淮至陰陵迷失道左陷大澤漢令騎將灌嬰以五千騎追及之於斯縣者也按地理志王莽之陰陸也後漢九江郡治時多虎災百姓苦之南陽朱均爲守退貪殘進忠良虎悉東渡江又東過當塗縣北過水從西北來注之

淮水自莫耶山東北逕馬頭城北魏馬頭郡治也故當塗縣之故城也呂氏春秋曰禹娶塗山氏女

不以私害公自辛至甲四日復往治水故江濶之俗以辛壬癸甲爲嫁娶日也禹娶在山西南縣卽其地也地理志當塗侯國也魏不害以宰守尉捕淮陽反者公孫勇等漢以封之王莽更名山聚也淮水又東北濠水注之

水出莫耶山東北之溪溪水西北引瀆逕禹墟北又西流注于淮

淮水又北沙水注之

經所謂蕩蕩渠也淮之西有平阿縣故城王莽之平寧也建武十三年世祖更封耿阜爲侯國郡國



志曰平阿縣有當塗山淮出于荆山之左當塗之  
右奔流二山之間西楊濤北注之春秋左傳哀公  
十年大夫對孟孫曰禹會諸侯于塗山執玉帛者  
萬國杜預曰塗山在壽春東北非也余按國語曰  
吳伐楚噍會稽獲骨焉節專車吳子使來聘且問  
之客執骨而問之敢問骨何爲大仲尼曰丘聞之  
昔禹致羣神於會稽之山防風氏後至禹殺之其  
骨專車此爲大也蓋丘明親承聖旨錄爲實証矣  
又按劉向說苑辯物王肅之敘孔子世孫孔猛所  
出先人書家語並出此事故塗山有會稽之名考

校羣書及方士之目疑非此矣蓋周穆之所會矣  
淮水於荆山北過水自南注之又東北逕沛郡義  
城縣東司馬彪曰後隸九江也

又東過鍾離縣北

世本曰鍾離嬴姓也應劭曰縣故鍾離子國也楚  
滅之以爲縣春秋左傳所謂吳公子光伐楚拔鍾  
離者也王莽之螽富也豪水出陰陵縣之陽亭北  
小屈有石穴不測所窮言穴出鍾乳所未詳也豪  
水東北流逕其縣西又屈而南轉東逕其城南又  
北歷其城東逕小城而北流注于淮



淮水又東逕夏丘縣南

又東渙水西入九里注之渙水又東南流逕雖丘縣故城南又東逕承匡城又東逕襄邑縣故城南故宋之承匡襄牛之地宋襄公之所築故子襄陵矣竹書紀年梁惠成王十七年宋景公衛孫公倉會齊師圍我襄陵十八年惠成王以韓師諸侯師于襄陵縣齊侯使楚景舍來求成公會齊宋之圍卽於此也西有承匡城春秋會于承匡者也秦始皇以承匡卑濕徙縣於襄陵更爲襄邑也王莽以爲襄平也漢桓帝建和元年封梁冀子胡狗爲侯

國陳留風俗傳曰縣南有渙水故傳曰睢渙之間出文章天子郊廟御服出焉尚書所謂厥篚織文者也渙水又東南逕巴吾縣故城南又東逕鄆城北春秋襄公元年經書晉韓厥帥師伐鄭魯仲孫義會齊曹邾杞次于鄆杜預曰陳留襄邑縣東南有鄆城渙水又東南逕鄆城北新城南又東南左合明溝溝水自蓬洪陂東南流謂之明溝下入渙水又逕亳城北帝王世記曰穀熟爲南亳卽湯都也十三州志曰漢武帝分穀熟置春秋莊公十三年宋公子御讒奔亳者也渙水東逕穀熟城南漢



光武建武二年封更始子歆爲侯國又東逕楊亭  
北春秋左氏傳襄公十二年楚子囊秦庶長無地  
伐宋師于楊梁以報晉之取鄭也京相璠曰宋地  
矣今睢陽東南三十里有故楊梁今日陽亭也俗  
名之曰緣城非矣西北去梁國八十里渙水又東  
逕沛郡之建平縣故城南漢武帝元年封杜延年  
爲侯國王莽之曰平也又東逕鄆縣故城南春秋  
襄公十年公會諸侯及齊世子光于鄆今其地鄆  
聚是也王莽之鄆治矣漢水又東南逕費亭南漢  
建和元年封中常侍沛國曹騰爲侯國騰字季興

譙人也永初中定桓帝策封亭侯此城卽其所食  
之邑也渙水又東逕銍縣故城南昔吳廣之起兵  
也使葛嬰下之渙水又東苞水注之出譙城北自  
汀陂陂水東流逕鄆縣南又東逕鄆縣故城南漢  
景帝中元年封周應爲侯國王莽更之曰留城也  
音多又東逕嵇山北嵇氏故居嵇本姓奚會稽人  
也先人自會稽遷于譙之銍縣故爲嵇氏取稽字  
之上以爲姓蓋志本也嵇氏譜曰譙有嵇山家于  
其側遂以爲氏縣魏黃初中文帝以鄆城父山桑  
銍置譙郡故隸譙焉苞水東流入渙渙水又東南



逕斬縣故城南地理志曰故垂鄉也漢高帝破黥  
布於此縣舊都尉治王莽之斬城也水上有古石  
梁處遺基尚存渙水又東逕穀陽縣右會八丈故  
瀆瀆上承汶水南流注于渙渙水又東逕穀陽戍  
南又東南逕穀陽故城東北右與解水會水上承  
縣西南解塘東北流逕穀陽城南卽穀水也應劭  
曰城在穀水又東北流注于渙渙水又東南逕白  
石戍南逕蚘城南汶水注之水首受斬水於斬縣  
東南流逕穀陽縣八丈故瀆出焉又東合長直故  
溝溝上斬水南會于汶汶水又東南流于汶縣故

城北縣有垓一聚漢高祖破項羽所在也王莽更  
名其縣曰育城應劭曰汶水所出音絞經之絞也  
汶水又東南入于淮故應劭曰汶水南入淮淮水  
又東至巉石山潼水注之水首受潼縣西南潼陂  
縣故臨淮郡之屬縣王莽改曰成信矣南逕沛國  
夏丘縣絕斬逕夏丘縣故城西王莽改曰歸思也  
又東南流逕臨潼戍西又東南至巉石西南入淮  
淮水又東逕浮山

山北對巉石山梁氏天監中立堰於二山之間逆  
天地之心乖民神之望自然水潰淮矣



淮水又東逕徐縣南歷澗水注之

導徐城西北徐陂陂水南流絕蘄水逕歷澗水西  
東南流注于淮

淮水又東池水注之

水出東城縣東北流逕東城縣故城南漢以數千  
騎追羽帥二十八騎引東城因西隕山斬將而去  
卽此處也史記孝惠八年封淮南厲王子劉賜爲  
國地理志王莽更名之曰武城也池水又東北流  
歷二山間東北入于淮謂之池口也

淮水又東蘄水注之

水受睢水於穀熟城東北東逕建城縣故城北漢  
光武元朔四年封長沙定王子劉拾爲侯國王莽  
之多聚蘄水又東南逕蘄縣縣有大澤鄉陳涉起  
兵于此篝火爲狐鳴處也南則洨水出焉蘄水又  
東南北入丈八故溝出焉又東流南北長直故瀆  
出焉又東入夏丘縣東絕潼水逕夏丘縣故城北  
又東南逕潼縣南又東流入徐縣東絕歷澗又東  
逕大徐縣故城南又東流注于淮

淮水又東歷客山逕盱眙縣故城西

地理志曰都封治漢武帝元朔元年封江都易王



子劉蒙之爲侯國王莽更名之曰匡武淮水又東逕廣陵廣淮陽城北臨泗水岨于二水之間述征記淮陽太守治自後置戍縣亦有時廢興也

又東北至下邳淮陰縣西泗水從西北來流注之淮泗之會卽角城也左右兩川翼夾二水決入之所所謂泗口也

又東過淮陰縣北中瀆水出白馬湖東北注之

淮水右岸卽淮陰也城西二里有公路浦昔袁術向九江將東奔袁譚路出斯浦因以爲名焉又東逕淮陰縣故城北北臨淮水漢高帝六年封韓信

爲侯國王莽之嘉信也昔韓信去下鄉而釣於此處也城東有兩冢西者卽漂母冢也周迴數百步高十餘丈昔漂母食信於淮陰信王下邳蓋投金增陵以報母矣東一陵卽信母冢也縣有中瀆水首受江于廣陵郡之江都縣縣城臨江應劭地理風俗記曰縣爲一都之會故曰江都也縣有江水祠俗謂之伍相廟也子胥但配食耳歲三祭與五岳同舊水道也昔吳將伐齊北霸中國自廣陵城東南築邗城城下掘深溝謂之韓江亦曰邗溟溝自江東北通射陽湖地理志所謂築水也而北至



末口淮自永和中江都水斷其水上承歐陽引江入埭六十里至廣陵城楚漢之間爲東陽郡高祖六年爲荆國十一年爲吳城卽吳王濞所築也景帝四年更名江都武帝元狩三年更曰廣陵王莽郡曰江平縣曰定安城東水上有梁謂之洛橋中瀆水自廣陵北出武廣湖東陸陽湖西二湖東西相直五里水出其間下注樊梁湖舊道東北出至博芝射陽二湖西北出來耶乃至山陽矣至永和  
中患湖道多風陳敏因穿樊梁湖北口下注津湖逕渡渡十二里方達北口直至夾耶興寧中復以

津湖多風又自湖之南北口泐東岸二十里穿渠入北口自後行者不復由湖故蔣濟三州論曰淮湖紆遠水陸異路山陽不通陳穿溝更鑿馬瀨百里渡湖者也自廣陸出山陽白馬湖逕山陽城西卽射陽縣之故城也應劭曰在射水之陽漢高祖六年封楚左令尹項纏爲侯國也王莽更之曰監淮亭世祖建武十五年封子荆爲山陽公治此十七年爲王國城本北中郎將庾希所鎮中瀆又東謂之山陽浦又東入淮謂之山陽口者也又東兩小水流注之



淮水左逕泗水國南故東海郡也徐廣史記音義  
曰泗水國名漢武帝元鼎三年初置都郟四年常  
山憲王子思王商爲國地理志曰王莽更泗水郡  
爲順水陵縣爲生麥淩水注之水出淩縣東流逕  
其縣故城東而東南流注于淮寔曰口也應劭曰  
淩水出縣西南入淮卽經所謂之小水者也  
又東至廣陵淮浦縣入于海

應劭曰浦岸也蓋側淮濱故受此名淮水出縣故  
城王莽更名之曰淮敬淮水於縣枝分北爲游水  
歷胸縣與沐合又匡胸山西山側有胸縣故城秦

始皇三十五年於胸縣立石海上以爲秦之東門  
崔琰述初賦曰倚高艦以周盼兮觀秦門之將將  
者也東北海中有大洲謂之郁洲山海經所謂郁  
山在海中者也言是山自蒼梧徙此云山上猶有  
南方草木今郁州治故崔季珪之敘述初賦言郁  
州者故蒼梧之山也心悅而恠之聞其上有仙士  
石室也乃枉觀所見一道人獨處休休然不談不  
對顧非已及也卽其賦所云吾夕曰濟于郁州者  
也游水又北逕東海利城縣故城之東故利鄉也  
漢武帝元朔四年封城陽其王子嬰爲侯國王莽



更之曰流泉游水又北歷羽山西起地理志曰羽山在祝其縣東南尚書曰堯時曰四岳得舜進十六族殛鯀于羽山是爲禱杙與驩兜三苗共工同其罪故世謂之四凶鯀旣死其神化爲黃龍入于羽淵是爲夏郊三代祀之故連山易曰有崇伯鯀伏于羽山之野者是也游水又北逕祝其縣故城西春秋經書夏公會齊侯于夾谷左傳定公十年公及齊平會于祝其實夾谷也服虔曰地二名王莽更之曰猶亭縣之東有夾口浦游水左逕瑯琊卽丘縣故城之西地理志曰莒子始起于此後徙

莒有鹽官故世謂之南莒也游水又東北逕贛榆縣北東側巨海有秦始皇碑在山上去海一百五十步潮水至加其上三丈去則三尺所見東北傾石長一丈八尺廣五尺厚三尺八寸一行一十二字游水又東北逕紀鄆故城南春秋昭公十年齊伐莒莒子奔紀鄆莒之婦人怒莒子之害其夫老而託訪焉取其纜而夜縋縋絕鼓譟城上人亦譟莒其公懼啓西門而出齊遂入紀故紀子帛之國穀梁傳曰吾伯姬婦歸于紀者也杜預曰紀鄆地二名東海贛榆縣東北有故紀城卽此水也游水



東北入海舊吳之燕岱常泛巨海憚其濤嶮更泐  
溯是瀆是由出地理志曰游水自淮浦北入海爾  
雅曰淮別爲澣游水亦枝稱者也

水經第三十

水經第三十一

漢 桑 欽 撰

後魏 酈 道 元 注

明 吳 瑄 校

澧水

涪水

澧水

濯水

澧水

澧水

澧水

澧水出南陽魯陽縣西之堯山

堯之末孫劉累以龍食帝孔甲孔甲又求之不得  
累懼而遷于魯縣立堯祠於西山謂之堯山故張  
衡南都賦曰奉先帝而追孝立唐祠於堯山堯山



在大和川太和城東北湫水出焉張衡南都賦曰  
其川瀆則湫澧灤澗發源巖穴布濩漫汗漭沆洋  
溢總括急趣箭馳風疾者也湫水又歷太和川東  
逕小和川又東溫泉水注之水出北山七泉奇發  
炎熱特甚鬪駟曰縣有湯水可以療疾矣湯側又  
有寒泉焉地勢不殊而炎涼異致雖隆火盛日肅  
若冰谷矣渾流同谿南流注湫水又東逕胡木山  
東流又會溫泉口水出北山阜炎勢奇毒痾疾之  
徒無能澡其衝漂救養者咸去湯十許步別池然  
後可入湯側有石銘云皇女湯可以療萬疾者也

故杜彥達云然如沸湯可以熟米飯而愈百病道  
士清身沐浴一日三飯多少自在四十日後身中  
萬病愈三蟲死學道遭難逢危終無悔心可以牢  
神存志卽南都賦所謂湯谷湧其後者也然宛縣  
有紫山山東有一水東西十五里南北二百步湛  
然沖滿無所通會冬夏常溫世亦謂之湯谷也非  
魯陽及南陽之縣故也張平子廣言土地所苞明  
非此矣湫水又東房陽川水注之水出南陽雒縣  
西房陽川北流注于湫湫水之北有積石焉世謂  
女靈山其山平地介立不連岡以成高峻石孤峙



不託勢以自遠四面壁絕極能靈舉遠望亭狀單  
楹插霄矣北面有如頽落劣得道步好事者時有  
扳陟耳湫水又與波水合水出霍陽西川大嶺東  
谷俗謂之歇馬嶺川曰廣陽川非也卽應劭所謂  
孤山波水所出也馬融廣成頌曰浸以波澹其水  
又南逕蠻城下蓋蠻別邑也俗謂之麻城非也波  
水又南分三川於白亭東而俱南入湫水湫水自  
下兼波水之通稱也是故闕駟有東北至定陵入  
汝之文湫水又東逕魯陽縣故城南城卽劉累之  
故邑也有魯縣居其陽故因名焉王莽之魯山也

昔在於楚文子守之與韓構難戰有返景之誠內  
有南陽都鄉正衛爲牌湫水右合魯陽關水水出  
魯陽關外分頭山橫嶺下夾谷東北出入湫湫水  
又東北合牛蘭水水發縣北牛蘭山東南逕魯陽  
城東水側有漢陽侯焦立碑牛蘭水又東南與栢  
樹谿水合水出魯山北峽谷中東南流逕魯山西  
而南合牛蘭水又東南逕魯山南闕駟曰魯陽縣  
今其地魯山是也南水注于湫湫水東逕應城南  
故應鄉也應侯之國詩所謂應侯順德者也彭水  
注之俗謂之小湫水水出魯陽縣南彭山蟻塢東



麓北流逕彭山西下有彭山廟廟前有彭山碑漢  
相帝元嘉三年杜仲長立彭水逕其西北漢安邑  
長尹儉墓東冢西有石廟廟前有兩石闕闕東有  
碑闕南有二獅子相對南有石碣二枚石柱西南  
有兩石羊中平四年立彭水又東北流直應城南  
而入湓湓水又左合橋水水出魯陽縣北恃東東  
南逕應山北又南逕應城西地理志曰故文城縣  
之應鄉也周武王封其弟爲侯國應劭曰韓詩外  
傳稱周成王與弟戲以桐葉爲圭曰吾以封汝周  
公曰天子無戲言王乃應時而對故曰應侯鄉亦

曰應鄉按呂氏春秋云成王以桐葉爲圭封叔虞  
非應侯也汲郡古文殷時已有應國非成王矣戰  
國范睢所封邑也謂之應水湓水又東逕雙縣故  
城北左傳昭公元年冬楚公子圍使伯州犁城犇  
是也出于魚齒山下春秋襄公十八年楚伐鄭次  
于魚陵涉於魚齒之下甚雨楚師多凍徒役幾盡  
晉人聞有楚師師曠曰不害吾驟歌北風又歌南  
風南風不競多死聲楚必無功矣所涉卽湓水也  
水南有漢中常侍長樂太僕吉侯苞冢冢前有碑  
基西枕岡城開四門門有兩石獸墳傾墓毀碑獸



淪移人有掘出一獸猶全不破甚高壯頭去地減一丈許作制甚工左膊上刻作辟邪字門表壑上起石橋歷時不毀其碑云六帝四后是詔是誼蓋仕自安帝没于相后于時闡闡檀權五侯累世割剥公私以事生歿夫封者表有德碑者頌有功自非此徒何用許爲石至千春不若速朽苞墓萬古祇彰誚辱嗚呼愚亦甚矣渚水又東犍水注之俗謂之秋水非也水有二源東源出其縣西南踐犢山東崖下水方五十許步不測其深東北流逕犍縣南又東北屈逕其縣東而北合西流水西源

出縣西南頗山北阜下東北逕犍城西又屈逕其縣北東合二水亂流北注于渚漢高祖入關破南陽太守呂齶於犍東卽於是地渚水之陰也渚水又東南逕昆陽縣故城北昔漢光武與王尋王邑戰于昆陽敗之走者相騰踐奔殪百餘里會大雨如注渚川盛溢虎豹皆股戰士卒爭赴溺死者以萬數水爲不流王邑嚴尤陳茂輕騎皆乘尸而渡矣

東北過潁川定陵縣西北又東過堰縣南東入于汝渚水東逕西不羹亭南亭北背汝水於定陵城北



東入汝堰縣在南不得過

清水出弘農盧氏縣攻離山東南過南陽西鄂縣西北又東過宛縣南

清水導源東流逕鄠縣故城北郭仲產曰鄠縣故城南在攻離山東鄠舊縣也三倉曰樊鄧鄠鄠有二城北鄠也漢祖入關下浙鄠卽此縣也清水又東南流雒縣之雒衡山東逕百章郭北又東魯陽關水注之水出魯陽縣南分水嶺南水自嶺南流北水從嶺北注故世俗謂此嶺爲分頭也其水南流逕魯陽關左右連山插漢秀木干雲是以張景

陽詩云朝登魯陽關峽路峭且深亦司馬之與毋遇賊處也關水歷雒衡山西南逕皇后城西建武元年世祖遣侍中傅俊持節迎光烈皇后於清陽俊發兵三百餘人宿衛皇后道路歸京師蓋稅舍所在故城得其名矣山有石室甚飾潔相傳名皇后浴室又所幸也關水又西南逕雒縣故城南昔秦文公之世有陽伯者逢二童曰曰彼兩童二雒也得雌者霸雄者王二童飜飛化爲雙雒光武獲雒於此山以爲中興之祥故置縣以名焉關水又屈而東南流注于清清水又東南流逕博望縣



西北故城東郭仲產曰郡東北一百二里漢武帝  
置校尉張騫隨大將軍衛青西征爲軍前導相望  
水草得以不乏元光六年封騫爲侯國地理志曰  
南陽有望縣王莽改之曰宜樂也清水又東南逕  
西鄂故城東應劭曰江下有鄂故加西也昔劉表  
之攻杜子緒於西鄂也功曹伯孝長聞戰鼓之音  
懼而閉戶蒙被自覆漸登城而觀言勇可習也清  
水又南洱水注之水出弘農郡盧氏縣之熊耳山  
東南逕酈縣北東南逕方陽城北漢哀帝四年封  
南陽太守孫寵爲侯國俗謂之房陽川又逕西鄂

縣南水北有張平子墓墓之東側墳有平子碑文  
字悉是古文篆額是崔瑗之辭盛弘之郭仲產並  
云夏侯孝若爲郡薄其文復刊碑陰爲銘然碑陰  
二銘乃是崔子玉及陳翕耳而非孝若悉是隸字  
二首並存嘗無毀壞又言墓次有二碑今唯見一  
碑或是余夏逕驛途疲而莫究矣水南道側有二  
石樓相去六七丈雙峙齊竦高可丈七八柱圓圍  
二丈有餘石質青綠光可以鑒上鑿楹承拱雕簷  
四柱窮巧綺刻妙絕人工題言蜀郡太守姓王字  
子雅南陽西鄂人有二女無男而家累千金父沒



當葬女自相謂曰先君生我姊妹無男兄弟今當安神玄宅翳靈后土冥冥絕後何以彰吾君之德各出錢五百萬一女築墓二女建樓以表孝思銘云墓樓東平林不近墳墓而不能測其處所矣洹水又東南流注于清水世謂之肄洹聲相近非也地理志曰熊耳之山出三水洹水其一焉東南至魯陽入洹是也清水又南逕預山東山上有神廟俗名之爲獨山也山南有魏車騎將軍黃權夫妻二冢地道潛通其冢前有四碑其二魏明帝立二是其子及臣吏所樹者也清水又西南逕史定伯

碑南又西爲瓜里津水上有三梁謂之瓜里渡自宛道途東出赭陽而道方城建武三年世祖自赭陽西入破虜將軍劉奉怨漢掠新野拒瓜里上親搏戰降之夕陽下遂斬奉郡國志所謂宛有瓜里野津夕陽聚者也阻橋卽栢温故壘處温以升平五年與范注衆軍北討列營清水又西南逕晉蜀郡太守鄧義山墓南又南逕宛城東其地故申伯之郡楚文王滅申以爲縣也秦昭襄王使白起爲將伐楚取郢卽以此地爲南陽郡改縣曰宛王莽更名郡曰前隊縣曰南陽劉善曰在中國之南而



居陽地故以爲名大城西南隅郡古宛城也荊州  
刺史治故亦謂之荊州城今南陽郡治大城其東  
城城內有舊殿基周二百步高八尺陛階皆砌以  
青石大城西北隅有基周一百步高五丈蓋更始  
所起也地西三里有古臺高三丈餘文帝黃初中  
南巡行所築也清水又屈而逕其縣南故南都賦  
所言清水蕩其胷者也王莽地皇二年朱鮪等共  
於城南會諸將設壇燔燎立聖公爲天子於斯水  
上世語曰張繡反公於戰敗子昂不能騎進馬於  
公而昂遇害魏書曰公征至宛臨清水祠亡將士

歔歔流涕衆皆哀慟清水又南梅谿水注之水出  
縣北紫山南逕百里奚故宅奚宛人也於秦爲賢  
大夫所謂迷虞智秦者也紫谿又逕宛西呂城東  
史記曰呂尚先祖爲四嶽佐禹治水有功虞夏之  
際受封於呂故因氏爲呂尚也徐廣史記音義曰  
呂在宛縣高后四年封昆弟子呂恕爲呂城侯疑  
卽此也又按新蔡縣有大呂小呂亭而未知所是  
也梅谿又南逕杜衍縣東故城在西案漢高帝七  
年封郎中王翳爲侯國王莽更之曰閏衍矣土地  
塾下湍谿是注古人於安衆竭之令遊水是渚謂



之安衆港世祖建武三年上自宛遣潁陽侯祭遵  
西擊鄧奉弟衆破之於杜衍進兵涅陽者也梅谿  
又南謂之石橋水又謂之汝谿之流而左注清水  
清水之南又有南就聚郡國志所謂南陽宛縣有  
南就聚者也郭仲產言宛城南三十里有一城甚  
卑小相承名三公城漢時鄧禹等歸鄉餞離處也  
盛弘之著荊州記以爲三公置余按清水左右舊  
有二澁所謂南澁北澁者水側之澁聚在清陽之  
東北考古推地則近矣城側有范蠡祠蠡宛人祠  
卽故宅也後漢末有范曾字子閔爲大將軍司馬

討黃巾賊至此祠爲蠡立碑文勒可尋夏侯湛之  
爲南陽又爲立廟焉城東有大將軍何進故宅城  
西有孔嵩舊居嵩字仲山宛人與山陽范式有斷  
金契貧無養親賃爲阿街卒遣迎式式下車把臂  
曰子懷道卒伍不亦痛乎嵩曰侯嬴賤役晨門卑  
下之位古人所不耻何痛之有故其讚曰仲山通  
達卷舒無方屈身廝役挺秀含芳

又屈南過清陽縣東

清水又南入縣逕小長安司馬彪郡國志曰縣有  
小長安聚謝沈漢書稱光武攻清陽不下引兵欲



水經 卷之三十一  
攻宛至小長安與甄阜戰敗於此清水又西南逕其縣故城南相帝延熹七年封鄧康爲侯國縣故南陽典農治後以爲滄陽郡省郡復縣避晉簡文諱更名云陽焉清水又逕安樂郡北漢相帝建和六年封司徒胡廣爲滄陽縣安樂鄉侯今於其國立樂宅戍郭仲產襄陽記曰南陽城南九十里有晉尚書令樂廣故宅廣字彥輔也善清言見重當時成都王廣女婿長沙王猜之廣曰寧以一女而易五男猶疑之終以憂殞其故居今置戍因以爲名

又南過新野縣西西過鄧縣東南入于沔瀝水出瀝強縣南澤中東入潁

清水又南入新野縣枝津分派東南出苞隰衍注左積爲陂東西九里南北一十五里陂水所溉咸爲良沃清水又南與湍水會又南逕新野縣故城西世祖之敗小長安也姊元遇害上卽位感悼姊沒追謚元爲新野節義長公主卽此邑也晉咸寧二年封大司馬扶風武王少子歆爲新野郡分割南陽伍屬陽蔡陽穰鄧山都封焉王文舒更立中隔西卽郡治東則民居城西傍清水又東與朝水



合水出西北赤石山而東南逕冠軍縣界地名沙渠又東南逕穰縣故城南楚別邑也秦拔鄢郢卽以爲縣秦昭王封相魏冉爲侯邑王莽更名曰豐穰也魏荊州刺史治朝水又東南分爲二水一水枝分東北爲樊氏陂陂東西十里南北五里俗謂之凡亭陂陂東有樊氏故宅樊氏旣滅庾氏取其陂故嗙曰陂汪汪下田良樊子失業庾公昌昔在晉世杜預繼信臣之業復六門之場六門之水下結二十九陂諸陂散流咸入朝水事見六門碑六門旣陂諸陂遂斷朝水又東逕朝陽縣故城北而

東南注于涓水又東南與棘水合水上承赭水赭水出棘陽縣北數源並發南流逕小赭鄉謂之小赭水世祖建武二年成安侯臧宮從擊上赭也東源方七八步騰湧若沸故世名之騰沸水南流逕于赭鄉謂之赭水建武二年祭遵引兵南擊董訢於赭鄉以水氏縣故有赭陽之名也地理志曰縣有赭水王莽曰陽城也漢哀帝改爲順陽建武二年更封安陽侯朱祐爲赭陽侯赭水縣場以爲陂東西夾岡水相去五六里古今斷岡兩舌都水潭漲南北一十餘里水決南潰下注爲灣灣分爲二



西爲赭水東爲榮源赭水參差流結兩湖故有東  
陂西陂之名二陂所導俱水枝分東南至會口入  
泚是以地理志云泚水赭水皆言入蔡互受通稱  
故也二湖流注合爲黃水謂所受焉逕棘陽縣之  
黃淳聚又謂之爲黃淳水者也故謝沈漢書甄阜  
等敗光武于小長安東乘勝南渡黃淳水前營皆  
阻兩川謂臨泚水絕後橋示無還心漢兵擊之二  
軍潰溺死黃淳水者二萬人又南逕棘陽縣故城  
西應劭曰縣在棘之陽是知斯水爲棘水也漢高  
帝七年封莊得臣爲侯國後漢兵超擊唐子鄉殺

湖陽尉進拔棘陽鄧晨將賓客會光武于此縣也  
棘水又南逕新野縣歷黃郵聚世祖建武二年傳  
俊岑彭進擊秦豐先拔黃郵者也謂之黃郵水大  
司馬吳漢破秦豐於斯水之上其聚落悉爲蠻居  
猶名之爲黃郵蠻棘水自新野縣東而南流入于  
涓水謂之爲力口也棘力聲相近當爲棘口也又  
是方俗之音故字從讀變若世以棘子木爲力子  
之木灑水東北流枝瀆右出世謂之灰汝也別汝  
又東北逕召陵城北練溝出焉別汝又東汾溝出  
焉別汝又東逕征羌城北水南有汾陂俗音糞汾



水自別汝東注而爲此陂水積征羌城北四五里方三十里許瀆左合小瀝水水上承狼陂南流名曰鞏水清陵陂水自陂東注之東迴又謂之小瀝水而南流注于大瀝水大瀝水取稱蓋藉瀝汾注而惣受巨目矣又東逕西華縣故城南又東逕汝陽縣故城北東注于潁

濯水出汝南吳房縣西北興山東過其縣北入于汝縣西北有堂谿城故房子國春秋定公五年吳王闔閭弟夫概奔楚封之於堂谿故曰吳房也漢高帝八年封莊侯楊武爲侯國建武中世祖封泗水

來歙子軍爲堂谿侯山谿有白羊淵淵水舊出山羊漢武元封二年白羊出北淵畜牧者禱祀之俗禁拍手嘗有羊出水野母驚仆自此絕焉淵水下合濯水濯水東逕濯陽縣故城西東流入瀨水亂流逕其縣南世祖建武元年封吳漢孫且爲侯國其水又東入于汝水

瀨水出無陰縣東上界山

山海經謂之瀨水也郭景純注或曰視宜爲瀨出歲山許慎云出中陽山皆山之殊目也而東與此水合水出無陰縣草山東北流注瀨瀨水又東北



殺水出西南大孰之山東北流入于瀕瀕水又東  
淪水注之水出宣山南東流注瀕水瀕水又東得  
輿水口水西出輿山東入于瀕水也

東過吳房縣南又東過濯陽縣南

應劭曰濯水出吳房縣東入瀕縣之西北卽兩川  
之交會也

又東過上蔡縣南東入汝

無水出無陰縣西北扶予山東過其縣南

山海經曰朝歌之山無水出焉東流于榮經書扶  
予者其山之異名乎榮水上承赭水東流左與西

遼水合又東東遼水注之俱導北山而南流注于

榮榮水又東北於無陰縣北左會無水之道稍西

不出其縣南其故城在山之陽漢光武建武中封

岑彭爲侯國漢以爲陽山縣魏武與張繡戰于宛

馬名絕景爲流矢所中公傷右臂引還無陰卽是

地也城之東有馬仁陂郭仲產曰陂在泚陽縣五

十里蓋地百頃其所周漑田萬頃隨年變種境無

儉歲陂水三周其隍故瀆自隍西南而會於泚無

水不得復逕其南也且邑號無陰故無出南之理

出南則爲陽也非直不究又不思矣無水又東北



河水注之水出雒衡東山南逕建城東建當爲卷  
字讀悞耳郡國志云葉縣有卷城其水又東流入  
于澠澠水東北逕于東山西西流入澠澠水之左  
卽黃城山也水出黃城山東北逕方城郡國志曰  
葉縣有方城郭仲產曰苦萊于東之間有小城名  
方城東臨谿水尋此城致號之由當因山以表名  
也苦萊卽黃城也及于東通爲方城矣世謂之方  
城山水東流流澠水故地理志曰南陽葉方城邑  
西有黃城山是長沮桀溺耦耕之所有東流水則  
子路問津處尸子曰楚狂接輿耕於方城蓋於此

也盛弘之云葉東界有故城始犇縣東至瀨水達  
泚陽界南北聯絡數百里號爲方城一謂之長城  
云酈縣有故城一面未詳里數號爲長城卽此城  
之西隅其間相去六里若南北雖無基築皆連山  
相接而漢水流其南故屈完答齊桓公云楚國方  
城以爲城漢水以爲池郡國志曰葉縣有長城曰  
方城指此城也澠水又東北歷舞陽縣故城南漢  
高祖元年封樊噲爲侯國也

又東過西平縣北

縣故桓國也春秋左傳所謂江黃道桓方穆於齊



也漢曰西平其西呂墟卽西陵亭也西陵平夷故  
曰西平漢宣帝甘露二年封丞相于定國爲侯國  
王莽更之曰新亭晉太康地理志曰縣有龍泉水  
可以砥礪刀劔特堅利故有堅白之論矣是以龍  
泉之劔爲楚寶也縣出名金古有鐵官

又東過鄆縣南

鄆縣故城去此遠矣不得過

又東過定潁縣北東入于汝

漢安帝永初二年分汝南郡之上蔡縣置定潁縣  
延光中以陽翟郭鎮之爲尚書令封定潁侯卽此

邑也

澗水出蔡陽縣

澗水出縣東南大洪山山在隋郡之西南竟陵之  
東北槃基所跨廣圓一百餘里峯曰縣鈎處平縣  
衆阜之中爲諸嶺之秀山下有石門夾鄣層峻巖  
高皆數百許仞入石門又得鍾乳穴穴上素崖壁  
立非人跡所及穴中多鍾乳凝膏下垂望齊冰雪  
微津細液滴瀝不斷幽穴潛遠行者不極窮溪而  
穴內常有風熱火無能以經久故也澗水出于其  
陰初流淺狹遠乃廣厚可以浮舟楫巨川矣時人



以澠水所導故亦謂之爲澠山矣澠水東北流合石水石水出大洪山東北流注于澠謂之小澠水而亂流東北逕上唐縣故城南本蔡陽之上唐鄉舊唐侯國春秋定公三年唐成公如楚有兩肅霜馬子常欲之不與止之三年唐人竊馬而獻之子常歸唐侯是也澠水又東均水注之水出洪山東北流逕土山北山上土山又東北流入于澠水澠水又屈而東南流

東南逕隋縣西

縣故隋國矣春秋左傳所謂漢東之國隋爲大者

也楚滅之以爲縣晉武太康中立爲郡有澆水出縣西北黃山南逕瀲西縣西又東南瀲水入焉瀲水出桐栢山之陽呂忱曰水在義陽瀲水東南逕瀲西縣西又東南流于澆澆水又東南逕隋縣故城西春秋魯莊公四年楚武王伐隋令鬬祁莫敖屈重除道梁澆軍臨于隋謂此水也水側有斷蛇丘隋侯出而見大蛇中斷因舉而藥之故謂之斷蛇丘後蛇銜明珠報德世謂之隋侯珠亦曰靈蛇珠丘南有隋季良大夫池其水又南與義井水合水出隋城東南井泉嘗湧溢而津注冬夏不異相



承謂之義井下流合澁澁水又南流注于澨澨水  
又會于支水水源亦出大洪山而東流注于澨澨  
水又逕隋縣南隋城山北而東南注

又南過江夏安陸縣西

遼水出隋郡永陽縣東石龍山西北流南迴逕永  
陽縣西歷橫尾山卽禹貢之陪尾山也遼水又西  
南至安陸縣故城西故鄖城也因岡爲墉峻不假  
築澨水又南逕石巖山北昔張昌作亂於其下籠  
綵鳳以惑衆晉太安二年鎮南將軍劉弘遣牙門  
皮初與張昌戰於清水昌敗追斬於江夏卽春秋

左傳定公四年吳敗楚于柏舉從之及于清發蓋  
澨水又東南流而右會富水出竟陵郡新市縣東  
北大陽山水有二源也大富水出山之陽南流而  
左合小富水水出山之東而南逕三王城東前漢  
末王匡王鳳王常所屯故謂之三王城城中有故  
碑文字闕落不可復識其水屈而西南流右合大  
富水俗謂之大泌水也又西南流逕杜城西新市  
縣治也郡國志以爲南新市也中山有新市故此  
加南分安陸立縣又王匡中興初舉兵於縣號曰  
新市兵也富水又東南流于安陸界左合土山水



世謂之章水水出土山南逕隨郡平林縣故城西俗謂之將陂城與新市接界故中興之始兵有新市平林之號又南流右入富水富水又東入于澗澗水又逕新城南永和五年晉大司馬栢溫築澗水又會溫水溫水出竟陵之新陽縣東澤中口徑二丈五尺垠岸重沙端淨可愛靖以察之則淵泉如鏡聞人聲則揚湯奮發無所復見矣其熱可以燂雞洪瀏百餘步冷若寒泉東南流注于澗水又右得潼水水出江夏郡之曲陵縣西北潼山東南流逕其縣南縣治石潼故城城圓而不方東入安

陸注于澗水

又東南入于夏

澗水又南分爲二水東通澗水西入于沔謂之澗口也



水經第三十一

水經第三十二

漢 桑 欽 撰

後魏 酈 道 元 注

明 吳 瑄 校

涿水

蘄水

決水

泚水

泄水

肥水

施水

沮水

漳水

夏水

羌水

涪水

潼水

涇水

涿水出江夏平春縣西

涿水北出大義山南至厲鄉西賜水入焉水源東



出大紫山分爲上水一水西逕厲鄉南水南有重  
山卽烈山也山下有一穴父老相傳云是神農所  
生處也故禮謂之烈山氏水北有九井子書所謂  
神農旣誕九井自穿謂斯水也又言汲一井則衆  
水動井今堙塞遺迹髣髴存焉亦云鄉故賴國也  
有神農社賜水西南流入于溲卽厲水也賜厲聲  
相近宜爲厲水矣一水出義鄉西南入隋又注溲  
溲水又南逕隋縣注安陸也

南過安陸入于溲

蘄水出江夏蘄春縣北山

山卽近柳也水首受希水枝津西南流歷蘄山出  
蠻中故以此蠻爲五水蠻水卽謂巴水也又赤亭  
水西歸水蠻左馮居咀藉山川世爲抄暴宋世沈  
慶之於西陽上下誅伐蠻夷卽五水蠻也

南過其縣西

晉改爲蘄陽縣縣從江州置大陽戍後齊安郡移  
治於此也

又南至蘄口南入于江

蘄水南對蘄陽州入于大江謂蘄口洲上有蘄陽  
縣徙



決水出廬江雩婁縣南大別山

俗名之爲檀山峴蓋大別之異名也其水歷山委注而絡其縣也

北過其縣東

縣故吳也春秋左傳襄公二十年楚子秦人侵吳及雩婁聞吳有備而還是也晉書地道記云在安豐縣之西南卽其界也故地理志曰決水出雩

又北過安豐縣東

決水自雩婁縣北逕雞備亭春秋昭公二十三年吳敗諸侯之師于雞父者也安豐縣故城今邊城

郡治也王莽之美風也世祖建武八年封大將軍

涼州牧竇融爲侯國晉立安豐郡決水自縣西北

流逕蓼縣故城東又逕其北漢高帝六年封爲孔

侯國也世謂之決水也水又西北灌水注之其水

導源廬江金蘭縣西北東陵鄉太蘇山卽注水也

許慎曰出雩婁縣俗謂之澮水也楮先生所謂神

龜出于江灌之間嘉林之中蓋謂此水也灌水東

北逕蓼縣故城西而北注決水也故地理志曰決

水北注蓼入灌灌水於蓼亦入決春秋宣公八年

冬楚公子滅舒蓼臧文仲聞之曰臯陶庭堅不祀



忽諸德之不逮民之無援哀哉決水又北右會陽  
泉水水受決水東北流逕陽泉縣故城東故陽泉  
鄉也漢靈帝中封太尉黃琬爲侯國又西北流左  
入決水謂之陽泉石也

又北入于淮

俗謂之決口非也斯決灌之口矣余往因公至于  
淮津舟車所屆次于決水訪其民宰與古名全違  
脉水尋經方知決水蓋灌澮聲相倫習俗害真耳  
泚水出廬江濇縣西南霍山東北

濇者山水名也開山圖濇山圍繞大山爲霍山郭

景純曰濇水出焉縣卽其稱矣春秋昭公二十七  
年吳因楚喪圍濇是也地理志曰泚水出泚山不  
言霍山泚字或作淠水又東北逕博安縣泄水出  
東北過六縣東

淠水東北右會踰鼓川水水出東南踰川西北流  
左注淠水淠水又西北逕馬亭城西又西北逕六  
安縣故城西縣故咎陶國也夏禹封其少子奉其  
祀今縣都陂中有大冢民傳曰公琴者卽臯陶冢  
也楚人謂冢爲琴矣漢高帝元年別爲衡山國五  
年屬淮南文帝十六年復爲衡山國武帝元狩二



年別爲六安國王莽之安風也漢書所謂以舒屠  
六晉太康三年廬江郡治淠水又西北分爲二水  
出焉又北逕五門亭西西北流逕安豐縣故城西  
晉書地道記安豐郡之屬縣也俗名之曰安城矣  
又北會濡水亂流西北注之

北入于淮

水之決會謂之泚口也

泄水出博安縣

博安縣地理志之博鄉縣也王莽以爲楊陸矣泄  
水自縣上承北水於麻步川西北歷山濡谿謂之

濡水也

北過芍陂西與泚水合

泄水自濡谿水安風縣北流注于淠一謂之其濡  
口

西北入于淮

亂流同國也

肥水出九江成德縣廣陽鄉西

呂忱字林曰肥水出良餘山俗謂之連枷山亦或  
以爲獨山也北流分爲二水施水出焉肥水又北  
逕獲城東又北逕荻江東又會施水枝津首受施



水於合肥縣城東西流逕成德縣注于肥水也  
肥水別北過其縣西北入芍陂

肥水自荻丘北逕成德縣故城西王莽更之曰平  
阿也又北逕芍陂東又北逕歿馬塘東芍陂瀆上  
承井門與芍陂更相通注故經言入芍陂矣肥水  
東北又合閻潤水上承施水於合肥縣北流逕復  
道縣西水積爲陽湖陽湖水自塘西北逕歿亭  
南夾橫塘西注宋太始初豫州司馬劉順帥衆八  
千據其城地以拒劉劭杜叔寶以精兵五千送糧  
歿亭劉劭破之此塘水分爲澗二洛澗出焉閻漿

水注之水受芍陂陂水上承謂水於五門亭南別  
爲斷神水又東北流逕五門亭東亭爲衆水之會  
也斷神水又東北逕神迹亭東又北謂之豪水雖  
廣異名事實一水又東北逕白芍亭東積而爲湖  
謂之芍陂陂周一百二十許里在壽春縣南八十  
里言楚相孫叔敖所造魏太尉王陵與吳將張休  
文戰於芍陂卽此處也陂有五門吐納川流西北  
爲香門陂水北逕孫叔敖祠下謂之芍陂瀆又北  
分爲二水一水東注黎漿漿水東逕黎漿亭南文  
欽之叛吳軍北入諸葛緒拒之於黎漿卽此水也



東注肥水謂之黎漿水口

又北過壽春縣東

肥水自黎漿北逕壽春縣故城東爲長瀨津津側有謝堂北亭迎送所薄水陸舟車是焉萃止又西北左合東谿谿水引瀆北山西南流逕導公寺西寺側因谿建刹五層屋宇閒敞崇虛携覺也又西南流注于肥肥水又西逕東臺下臺卽壽春外郭東北隅阿之榭也東側有一湖三春九夏紅荷覆水引瀆城隍水積成潭謂之東臺湖亦肥南播也肥水西逕壽春縣城北右合北谿水導北山泉源

下注漱石頽隍水上長林插天高柯負日出於山林精舍右山淵寺左道俗嬉遊多萃其下內外引汲泉同七淨谿水泂注西南逕陸道士解南精廬臨側川谿大不爲廣小足閒居亦勝境也谿水流注于肥水

北入于淮

肥水又西分爲二水右卽肥之故瀆遏爲船官湖以置舟艦也肥水左瀆又西石橋門北亦曰草市門外有石梁渡此洲洲上有西昌寺寺三百阻水佛堂設三像真容妙相相服精偉是蕭武帝所立



也寺西卽船官坊倉光都水是營是作湖北對八  
公山山無樹木唯重阜耳山上有淮南王劉安廟  
劉安是漢高帝之孫厲王長子也析節下士篤好  
儒學養方術之徒數十人皆爲俊異焉多神仙祕  
法鴻寶之道忽有八公皆鬚眉皓素詣門希見門  
者曰吾王好長生今先生無住衰之術未敢相聞  
八公咸變成童王甚敬之八士並能鍊金化丹出  
入無間乃與安登山埋金於地白日昇天餘藥在  
噐雞大舐之者俱得上昇其所昇之處踐石皆陷  
人馬跡存焉故山卽以八公爲目余登其上人馬

之跡無聞矣唯廟像存焉廟中圖安及八士像皆  
坐牀帳如平生被服纖麗咸羽扇裙帔巾壺枕物  
一如常居廟前有碑齊永明十年所建也山有隱  
室石井卽崔琰所謂余下壽春登北嶺淮南之道  
室八公石井在焉亦云左吳與王春傳生等尋安  
同詣玄洲還爲著記號曰八公記都不列其雞犬  
昇空之事矣按漢書安反伏誅葛洪明其得道事  
備抱朴子及神仙傳肥水又左納芍陂瀆瀆水自  
黎漿分水引瀆壽春北逕芍陂門右北入城昔鉅  
鹿時苗爲縣長是其留犢處也瀆東有東都街街



之左道北有宋司空劉劭廟宋元徽二年建于東鄉孝義里廟前有碑時年碑功方創齊永明元年方立沈約宋書言太始元年豫州刺史殷琰叛明帝假劭輔國將軍討之琰降不犯秋毫百姓來蘇生爲立碑文過其實建元四年故吏顏幼明爲其廟銘故佐寵埏爲妙讚夏侯敬友爲廟頌並附刊于碑側瀆水又北逕相國城東劉武帝伐長安所築也堂宇廳館仍故以相國爲名又北出城注肥水又西逕金城北又西左合羊頭谿水水受芍陂西北歷羊頭谿謂之羊頭澗水北逕熨湖左會烽

水瀆瀆受淮於烽村南下注羊頭谿側逕壽春城西又北歷象門自沙門北出金城西門逍遙樓下北注肥瀆肥水北注舊瀆之橫塘爲玄康南路馳道左通船官坊也肥水逕玄康城西北流水北出際有曲水堂亦嬉遊所集也又西北流昔在晉世謝玄北禦苻堅祈八公山及置陣於肥水之濱堅望山上草木咸爲人狀此卽故戰敗處非八公之靈有助蓋苻氏將亾之惑也肥水又西北注于淮是曰肥治也

施水亦從廣陽鄉東南入于湖



施水受肥於廣陽鄉東南流逕合肥縣應劭曰夏  
水出城父東南至此與肥合故曰合肥闕駟亦言  
出沛國城父東至此合爲肥余案川亾派別無公  
注之理方知應闕二說非實證也蓋夏水暴長施  
合於肥故曰合肥也非謂夏水自城父東逕合肥  
縣城南居四水中東又有逍遙津水上舊有梁孫  
權之攻合肥也張遼敗之於津北橋不撤者兩版  
權與甘寧蹀馬趨津谷利自後著鞭助勢遂得渡  
梁凌統被鎧落水後到追亾流涕津渚施水又東  
分爲二水枝水北出焉下注陽淵施水又東逕東

口戍東注巢湖謂之施口也

沮水出漢中房陵縣淮水東南過臨沮縣界

沮水出東汶陽郡沮陽縣西北景山卽荆山首也

高峰霞舉峻竦層雲山海經云金玉是出亦沮水  
之所導故淮南子曰沮出荆山高誘云荆山在左  
馮翊懷德縣蓋以洛水有漆沮之名故也斯謬證  
耳杜預云水出新城郡之西南發阿山蓋山異名  
也沮水東南流逕沮陽縣東南縣有潼水東逕其  
縣南下入沮水水又東南逕汶陽郡北卽高安縣  
界郡治錫城縣居郡下城故新城之下邑義熙初



分新城立西表悉重山也沮水南逕臨沮縣西青谿水注之水出縣西青山山之東有濫泉卽青谿之源也口徑數丈其深不測其泉甚靈潔至於炎陽有亢陰雨時以穢物投之輒能暴雨其水導源東流以源出青山故以青谿爲名尋源浮谿奇爲溪峭盛弘之云稠水傍生凌空交合危樓傾岳恒有落勢風泉傳響於青林之下巖後流聲於白雲之上遊者常若目不周翫情不給賞是以林徒栖託雲客宅心泉側多結道士精廬焉青谿又東流入于沮水沮水又屈逕其縣南晉咸和中爲沮陽

郡治也沮水又東南逕當陽縣北縣城因岡爲阻北抗沮川其故城在東一百四十里謂之東城在綠林長板南長板卽張翼德橫矛處也沮水又東南逕驢城西磨城東又南逕麥城西昔關雲長詐降處自此遂叛傳云子胥造驢磨二城以攻麥邑沮水又南逕楚昭王墓東對麥城故王仲宣之賦登樓云西接昭丘是也沮水又南與漳水合焉又東南過枝江縣東南入于江

沮水又東南逕長城東又東南流注于江謂之沮口也



漳水出臨沮縣東荆山東南過蓼亭又東過章鄉南荆山在景山東一百餘里新城沛鄉縣界雖羣峰競舉而荆山獨秀漳水東南流又屈西南逕編縣南縣舊東北一百四十里高陽城西南移治許茂故城城南臨漳水又南歷臨沮縣之彰鄉南昔關羽保麥城詐降而遯潘璋斬之於此漳水又南逕當陽縣又南逕于麥城東王仲宣登其東南隅臨漳水而賦之曰夾清漳之通浦倚曲沮之長洲是也漳水又南滌水注之山海經曰滌水出東北宜諸之山而流注于彰水

又南至枝江縣北鳥扶邑入于沮

地理志曰禹貢東條荆山在臨沮縣之東北漳水所出東至江陵入楊水注于沔非也今漳水於當陽縣之東南一百里餘而右會沮水也

夏水出江流于江陵縣東南

江津豫章口東有中夏口是夏水之首江之汜也屈原所謂過夏首而西浮顧龍門而不見也龍門卽郢城之東門也

又東過華容縣南

縣故容城矣春秋魯定公四年許遷于容城是也



北臨中夏水自縣東北逕成都郡故城南晉永嘉中西蜀阻亂割華容諸城爲潁王都夏水又逕交阯太守胡寵墓北漢太傅廣身陪陵而此墓側有廣碑故世謂廣冢非也其文言是蔡伯喈之辭歷范西戎墓南王隱晉書地道記曰陶朱冢在華容縣樹碑云是越之范蠡晉太原地記盛弘之荊州記劉澄之記並言在縣之西南郭仲產言在縣東十里檢其碑題云故西戎令范君之墓碑文缺落不詳其人稱蠡是其先也碑是永嘉二年立觀其所述最爲究悉似親逕其地故違衆說從而正之

水又東逕監利縣南晉武帝太康五年立縣土卑下澤多陂池西南自州陵東界逕于雲杜沌陽爲雲夢之藪矣韋昭曰雲夢在華容縣按春秋魯昭公三年鄭伯如楚子產備田具以田江南之夢郭景純言華容縣東南巴丘湖是也杜預云枝江縣安陸縣有雲夢蓋跨川亘隰兼苞勢廣矣夏水又東夏楊水注之水上承楊水於競陵縣之柘口東南流與中夏水合謂之夏楊水又東北逕江夏惠懷縣北而東北注

又東至江夏雲杜縣入于沔



應劭十三州記曰江別入沔爲夏水源夫夏之爲名始於分江冬竭夏流故納厥稱既有中夏之目亦苞大夏之名矣當其決水之所出謂之賭口焉鄭玄注尚書滄浪之水言今謂之夏水來同故世變名焉劉澄之著永初山川記云夏水古文以爲滄浪漁父所歌也因此言之水應由沔今按夏水是江流沔非沔入夏假使沔注夏其勢西南非尚書又東之文余亦以爲非也自賭口下沔水通兼夏目而會于江謂之夏沔也故春秋左傳稱吳伐楚沈尹射奔命夏沔也杜預曰漢水曲入江卽夏

口矣

羌水出羌中叅糧

彼俗謂之天池白水矣地理志曰出隴西羌道東南流逕宕昌城東西北去天池五百餘里水又東南逕宕昌婆川城東南北注羌水昔姜維之寇隴右也聞鍾會入漢中引還知雍州刺史諸葛緒屯橋頭從此谷將出北道緒邀之此路繼更從此道渡橋頭入劔閣緒追之不及羌水又東南陽部水注之水發東北陽部谿西南逕安民戍又西南注羌水又東南逕武階城西南又東南葭蘆城西羊



湯水入焉水出西北陰平北界湯谿東南逕北部  
城北又東南逕三部城南東南右妾水合傍西南  
出卽水源所發也羌水又逕葭蘆城南逕餘城南  
又東南左會五會水水有二源出南北五部谿西  
南流合爲一水屈而東南注羌水羌水又東南流  
至橋頭合白水東南去白水縣故城九十里  
又東南至廣魏白水縣與漢水合又東南過巴郡閬  
中縣又南至墊江縣東南入于江涪水出廣魏涪縣  
西北

涪水出廣漢屬國剛氏游徼外東南流逕涪水西  
王莽之統睦臧宮進破涪城斬公孫恢於涪自此  
水上縣有潺水出潺山水源有金銀礪洗取火合  
之以成金銀潺水歷潺亭而下注涪水涪水又東  
南逕縣竹縣北臧宮溯涪至平陽公孫述將王元  
降遂拔綿竹涪水又東南與建始水合水發平洛  
郡西谿西南流屈而東西流入於涪涪水又東南  
逕江由戍北鄧艾自陰平景谷步道縣兵東馬入  
蜀逕江由廣漢者也涪水又東南逕南安郡南又  
南與金堂水會水出廣漢新都縣東南流入涪涪  
水又南枝出焉西逕廣漢五城縣爲五城水又西



至成都入于江

南至小廣魏與梓潼合

小廣魏卽廣漢縣地王莽更名曰廣信也

梓潼水出其縣北界西南入于涪

故廣漢郡也公孫述改爲梓潼郡劉備嘉霍峻守  
葭萌之功又分廣漢以北別爲梓潼郡以峻爲守  
縣有五女蜀王遣五丁迎之至此見大蛇入山穴  
五丁引之山崩壓五丁及五女因是山爲五婦山  
又曰五婦候馳水所出一曰五婦水亦曰潼水也  
其水導源南逕梓潼縣王莽改曰子同矣自縣西

逕涪城東又南入于涪水謂之五婦水口也

又西南至小廣魏縣南入于墊江

亦言涪水至北入漢水昔岑彭與臧宮自江州從  
涪水上亦謂之爲內水也逕墊江公孫述令延岑  
盛兵於沈水宮左步右騎夾船而進勢動山谷大  
破岑軍斬首溺水者萬餘人水爲濁流沈水出廣  
漢縣下入涪水也

涪水出漢中南縣東南旱山北至沔陽縣南入于沔  
涪水卽黃水也東北流逕城固南城北城在山上  
或言韓信始立或言張良創築未知定所制矣義



熙九年索遐爲果州刺史自城固治此故謂之南  
城城周七里今澗帶谷絕壁百尋北谷口造城東  
門傍山尋澗五里有餘盤道登陟方得城治城北  
水舊有桁北渡泔水水北有趙軍城城北又有桁  
渡沔取北城城卽大城固縣治也黃水右岍有悅  
歸館泔水歷其北北至沔陽左沔爲三水口也

水經第三十二



